

Nova senda culturala Via Suworow

Sin ils fastizs d'in general russ

■ **(cp) A partir da l'entschatta da zercladur pon ins scuvrir ina nova senda culturala en las Alps centralas: la Via-Suworow. Ella suonda ils fastizs dal general russ Alexander Suworow che ha traversà cun sias truppas las Alps svizras l'atun da l'onn 1799.** Lieus commemorativs sin il Pass dal Gottard ed en la Chavorgia da la Scalina regordan a questa campagna militarica cun Alexander Suworow a la testa. ViaStoria – Center per l'istorgia dal traffic ha fixà la via sin basa da l'inventari da las vias da comunicaziun istoricas da la Svizra ed elavrà il project ViaSuworow. Quel è vegn realisà en stretga collavuraziun cun ils tschintg chantuns Tessin, Uri, Sviz, Glaruna e Grischun sco era cun agid da

la Regiun Surselva (vesair infobox). A partir da l'entschatta da zercladur è la ViaSuworow signalisada cumpletmain da SvizraMobil sco ruta da viandar regiunala 55 da La Svizra a pe. Tgi che absolve l'entira ViaSuworow va sur quatter pass, traversa trais regiuns linguisticas e vegn confruntà cun numerusas istorgias ed anecdotes – da la cassa da guerra probablain sfundrada en il Lai da Klöntal fin als schuldads che duain avair rut lur lantschas sin il Veptga e fatg in fiu per lur general spussà da 70 onns.

Il decurs da la ruta

Vegnind da l'Italia èn ils Russ ids a Ponte Tresa sur il cunfin dal Tessin, han surmuntà il Monte Ceneri ed il Pass dal Gottard

ed èn lura avanzads tras la Val d'Ursera e lung la Reuss fin ad Altdorf. La resistenza dals Franzos al Lai dad Uri ed en la Part Sut glarunaisa ha sfurzà Suworow da chattar in'otra ruta sur ils pass Chinzig Chulm e Prigel e finalmain da sa retrair cun ses umens tras la Val Sernft e sur il Veptga en Surselva. La ViaSuworow suonda la part centrala da questa ruta e maina en indeschetappas dal di dad Airolo a Glion.

In prospect plegabel er en russ

En collavuraziun cun l'organisatur da viadis Swiss Trails porscha il program Sendas culturalas da la Svizra arranschaments da plirs dis. Ils viandants pernotteschan en albierts elegids, pon profiter d'in transport da bagascha e survegnan

bleras infurmaziuns captivantas: viandar sin sendas veglias n'è forsa anc mai stà uschè divertent – lunsch davent dals strapatschs dals temps istorics.

La campagna militarica da Suworow è enconuschenta er en Russia. Fin ussa han surtut represchentants da la politica e da l'armada visità ils lieus memorabels sper la ViaSuworow. Ultra da viandants da la Svizra e da la Germania duain pli e pli era turists da la Russia scuvrir la nova senda culturala. In prospect plegabel infurmescha en tudestg e russ davart la ViaSuworow. Ins al po telechargiar sut www.kulturwegeschweiz.ch u empustar gratuit tar ViaStoria, Sendas culturalas da la Svizra, Kapellenstrasse 5, CH-3011 Berna, +41 (0)31 300 70 60, info@kulturwege-schweiz.ch.

In vast sustegn

La realisaziun da la ViaSuworow è vegnida sustegnida da: Agid svizzer per la Muntogna, Secretariat da stadi per l'economia Seco, chantun Tessin, chantun Uri, chantun da Sviz, chantun da Glaruna, chantun Grischun, Regiun Surselva, Corporaziun Uri, vischnanca d'Andermatt, vischnanca da Wassen, vischnanca da Silenen, vischnanca d'Altdorf e vischnanca burgaisa da Domat.